

Zéng Froen.

En Ziniklésche fir d'Schölkanner.

Ho, ho, ho!
 Fir wât sin d'Schölen do?
 Fir fléisség drân ze goen,
 An d'Lètz gut opzezoen;
 Ho ho ho ho ho!
 Zur Zêit sit emmer do.

Ho, ho, ho!
 Fir wât sin d'Méchtren do?
 Fir op hirt Wurt ze hëren,
 Se giér hun an ze ëren;
 Ho ho ho ho ho!
 Mächt hinnen net vill Plo.

Ho, ho, ho!
 Fir wât sin d'Bénken do?
 Fir roëg drop ze bleiwen,
 Ze liésen an ze schreiwen,
 Ho ho ho ho ho!
 Soss wesst der neischt derno.

Ho, ho, ho!
 Fir wât sin d'Eicher do?
 Net fir se ze ferknaen,
 An O'ren drân ze maen;
 Ho ho ho ho ho!
 Dât as net schënn dât do.

Ho, ho, ho!
 Fir wât sin d'Hëfter do?
 Net fir mât Tentellëcken
 All Sëiten ze bedëcken;
 Ho ho ho ho ho!
 Däs schmotzég dât elo.

Ho, ho, ho!
 Fir wât sin d'Léén do?
 Fir proper drob ze schreiwen,
 A schënn se ofzereiwen;
 Ho ho ho ho ho!
 Dë Schwamp as duorfir do.

Ho, ho, ho!
 Fir wât sin d'Blëcher do?
 Fir d'Fiédren ze fersuorgen,
 Më lang wë haut op muorgen;
 Ho ho ho ho ho!
 Däs Uordnonk dât elo.

Ho, ho, ho!
 Fir wât sin d'Tablen do?
 Net fir se ze ferrëssen
 Express se ze ferschlëssen;
 Ho ho ho ho ho!
 Däs Mutwell dât elo.

Ho, ho, ho!
 Fir wât sin d'Pausen do?
 Net fir séch ze zerklappen,
 An d'Kléder ze ferrappen;
 Ho ho ho ho ho!
 Dë kaschte Sue jo.

Ho, ho, ho!
 Fir wât dât Lidchen do?
 Fir dass der solt verstoen,
 Wë en séch muss bedroen;
 Ho ho ho ho ho!
 Verhalt dë Froen do.

November 1884.

M^{el} Lentz.